

ist / an das vndere teil der balgbrettern / wirt ein klammer angeschlagen. Es ist von dem hinderen teil des balgs / bey dreyer spannen / in disen ring durch das quärbrettlin welchs ein teil ist der gestelle zum blasbelgen / wirt ein hülzener rigel hinein getriben / dz also die vndere bretter des balgs / vhest bleibend: wiewol da seindt / die so den ring hinwegt gworffen zwo eiserne schrauben / wie mit näglen / dasselbige an das brett schlahend. Aber beide bogel wirt zwischen zweyen balgbretter gesetzt / vn̄ ist gleich so lang als das ober balgbret / beides wirt gemacht auß vier Linden brettlin / dreyer finger dick / welcher zwey lang seindt / am hinderen teil 7 quärfinger breit / am vorderen teil dritthalb quärfinger / das dritt / welch das hinderst / ist breit zweyer spannen / vnd sein beides haupt / ein weg dicker dan ein quärfinger / wirt in die langē brettlin geschlossen / vnd ist dasselbig auch durchbozet / vn̄ mit hülzernen näglen / mitt leim verstrichen / vnd in die löcher geschlagen / wirt mitt dem langen brettlin züsamen gesetzt vnd gleimpt: ja auch sein beides haupt / wirt mitt sampt des langen brettlin haupt vmbgebogen / daruon es dan genendt ist worden. Aber das vierde brettlin / welchs einer elen / von dem haupt des balgs ist / thut von einander / zwey lange brettlin / welchs köpfflin in die langen bretter geschlossen / mitt ihnen züsamen gesetzt vnd gleimpt werden / ist aber lang / außgenommen die köpfflin / ein werckschüh / vnd breit einer spannen / vnd zwen quärfinger. Ober das seindt auch andere zwey kleine brettlin / mit dem haupt des balgs / vnd dem vnderen brett angeleimet / vn̄ an das selbig mitt hülzernen nägeln auch mitt leim verstrichē / angeschlagē / welche lang seindt dreyer spanne vnd zweyer finger / einer spanne hoch / ein quärfinger dick / derē halber teil ist ein wenig abgehauē. Diese brettlin treibendt hinweg die heupter der langē brettlin von dem spundt loch des balgs haupt / welche so sie nicht werendt / so würdē ebē diese heupter mit so grossem vn̄stātem bewegē / innerhalb getrieben zerbrechē: das balgled aber ist von Ochsenhentē od Pferdshentē / aber das Ochsenled ist viel besser / dan dz Rossled: beyde aber / dan deren zwey seindt / am hinderē teil des balgs / da sie züsamen gefügt werden / ist breit dreyer werckschüh / vnd ein halben / aber zu beiden balgbrettern / vn̄ zu beide bogeln / ein langer riē ein jeden vnderworffen / werdē sie mitt krumen eisern nägeln angeschlagen / die fünff finger lang seindt. Aber deren beides horn ist zweyer finger lang vnd ein halben / ein halbē finger breit. Aber an die balgbretter werden mit so viel nāglē die balgleder angeschlagen / dz eines nagels horn des anderē horn gar nach anrühre / sond an die bogel vngleich. Dan an das hinderen brettlin des bogels / werden allein zwen nāgel angeschlagen / an beiden langen vier / mitt welcher weiß zwar geschicht / daß an ein bogel zehen nāgel geschlagen werden / vnd so viel auch an anderen: ja auch zum zeiten wann sich der schmeltzer besorgt / daß nicht die grosse bewegung des balgs von dem bogen / das balgleder von einander reisse / außserhalb disem an die lange brettlin / deren schlecht er sich tene brettlin mitt nägeln an / die er an die brettlin der bogen nicht anschlahen mag / daß sie ein wenig seindt gebogen. Etliche schlahendt das balgleder zu dem balgbrett vnd bogē nicht mitt eisern nägeln an / sonder mitt eisernē schraubē / in die brettlin dem balgleder auffgelegt / zumal getriben / wiewol aber diese weiß balgleder an züsclahen / minder im gebrauch ist dann die andere / so hatt es doch kein zweiffel / daß es im nutz die anderen übertruffe. Zulest ist des balgs haupt / gleich wie sein anderer leib / auß zweyen balgbrettern / vn̄ auch über das auß einer liesse: das ober balgbret ist einer elenlang / anderthalb spannen dick / aber das vnderst ist ein teil des ganzen vnderen balgbretts / zügleicher weiß auch das obere lang / aber dick einer spanne vn̄ quärfinger / auß welchen zweyē züsamen gleimpt / das balghaupt gemacht wirt / in welches so es durchbozet / die liesse geschlossen wirt / aber dz haupt ist am hinderē teil / auß welchem es den anderen leib anrühret / einer elen breit. So es aber zum dreyen spannen kōmen ist / so ist es zweyer finger enger worden / darnach wirt es als